



Senin, 05 Juni 2023

Ogen: Kuan-kuanen 3:19-20



“Embun Simereken Udan”



Piga-piga waktu belakangen enda, piga-piga daerah I Sumatra Utara mengalami bencana alam, misalna gempa, tanah longsor, banjir ras sidebanna. Bencana enda nadingken persoalen si mabai penderitaan man manusia; erkiteken melala harta benda si terdampak gempa, banjir bandang bage longsor sontar ras lanai teringani. Hal enda peturah aru ate dengen kebiaren man manusia. Aru atena erkiteken ertana bene; aru atena erkiteken sinuan-sinuanna ceda; aru atena erkiteken ulah manusia si la erukur erbahanca hancur kerinana ibas waktu si kentisik. I bas perdalanen kegeluhennta banci saja kita ngenanami kiniseran. Lenga dung sada, nggo ka reh persoalen si deban; mawen-mawen nggo tumpang tindih baban si man baban. Tempa-tempa lanai dat kita dalam puluh guna banci kita ngelewati persoalen e.

Bahan paksa tenengta wari enda ngataken kerna kuasa ras kemulian Dibata: "***Tuhan **njadiken doni enda alu kepentarenNa, alu kebeluhenNa itamakanNa langit ibas inganna. Alu pemetehNa ibahanNa maler lau belin, bage me embun si mereken udan ku doni enda*****".

Embun simereken udan; si la terukuri dengen tertaktaki manusia; si la terjangkau akal pikiran manusia; ijadiken Dibata gelahna manusia tetap nggejapken Kuasa dengen kemulian Dibata. KuasaNa la tersibari manusia dengen kemulianNa teridah arah kai siilakokenNa. Embun eme taktak lau tapi arah taktak e banci mperehken udan simpeturah kegeluhen. Bage me cara Dibata ncidahkan keleng ateNa nandangi kita manusia.

Marilah si jaga kinitekenta gelahna kita tetap banci ngidah kuasa dengen kemulian Dibata arah erbage-bage hal si nggo sibahanNa bas kegeluhenta. Salah sada caranta ncidahkan kiniteken eme njagai tinepa Dibata; subuk binatang-binatang idaraten bage pe i lau mbelin, dukut-dukut simeratah, batang kayu i kerangen.

"Kemulian Dibata teridah arah kerina tinepaNa"